

**BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINA KAKANJ
Općinsko vijeće**

Broj: 01/1-09-Z/17
Kakanj, 28.06.2017. godine

Z A P I S N I K

**sa 9. redovne sjednice Općinskog vijeća održane 28.06.2017. godine (srijeda) u velikoj sali za
sastanke Općinskog vijeća sa početkom u 9:00 sati
(sažetak zapisnika)**

Nakon intoniranja himne Bosne i Hercegovine, 9. sjednicu Općinskog vijeća otvorio je Slaven Katičić, predsjedavajući Općinskog vijeća, i pozdravio prisutne: općinske vijećnike i vijećnice, općinskog načelnika, pomoćnike općinskog načelnika, izvjestioce, obrađivače, predstavnike medija i goste.

Predsjedavajući je zamolio da vijećnici i vijećnice prijave svoje prisustvo.

Vijećnici i vijećnice prisutni na sjednici:

Džemal Bečirhodžić, Aldin Šljivo, Edin Aliefendić, Mejrema Purišević, Senad Alajbegović, Izudin Hrusto, Haris Veispahić, Adnan Ibrahimspahić, Amar Selimović i Safet Šahman, – vijećnici- **SDA**

Semir Mušija, Rizah Haračić, Jasmin Mušanović, Mirnes Merdić i Mugdin Gorak – vijećnici **SBB BiH**

Mirsad Tursum, Rešad Merdić, Fahrudin Buza, Adisa Škulj i Zerina Kovač – vijećnici **S BiH**

Enes Piljug i Eldin Mijoč – vijećnici **SDP BiH**

Nusret Muslić i Sedmedin Amidić – vijećnici **DF**

Slaven Katičić – vijećnik **HDZ BiH**

Mujo Fafulić – **nezavisni kandidat iz reda nacionalnih manjina.**

Odsutni vijećnici: Muhamed Kubat – vijećnik SDA, Ahmed Begić - vijećnik **SDP BiH**, Ivica Petrović – vijećnik **HDZ BiH** i Elvedin Delić – vijećnik **A-SDA**.

Predsjedavajući je konstatirao da su na sjednici u momentu prijave prisutno 25 vijećnika i vijećnica te da su se stekli svi potrebni uvjeti za validan rad i odlučivanje Općinskog vijeća.

Pored vijećnika sjednici su prisustvovali:

Nermin Mandra, općinski načelnik

Ferdo Mijač, sekretar Općinskog vijeća

Mirza Fazlić, pomoćnik općinskog načelnika za privredu, urbanizam i zaštitu okoline

Bahrudin Arnaut, pomoćnik općinskog načelnika za opću upravu, radne i zajedničke poslove, lokalnu samoupravu i mjesne zajednice – po ovlaštenju

Džihad Berbić, pomoćnik općinskog načelnika za finansije

Nurčo Kurtović, pomoćnik općinskog načelnika za imovinskopravne, geodetske poslove i katastar nekretnina

Nurudin Hrusto, pomoćnik općinskog načelnika za civilnu zaštitu

Rešad Zaimović, pomoćnik općinskog načelnika za društvene djelatnosti, boračka pitanja, raseljena lica, izbjeglice i povratnike

Zijad Neimarlija, direktor Zavoda za planiranje i izgradnju općine Kakanj

Vesna Ajanović, općinska pravobraniteljica

Izvjestioci, obrađivači, gosti

Mirnes Bajtarević – direktor JP „Grijanje“ d.o.o. Kakanj

Mehrudin Isaković – predstavnik Kantonalnog sindikata komunalne privrede

Fehim Merdić – predsjednik Sindikata JP „Vodokom“ d.o.o. Kakanj

Amir Dedić – predsjednik Radne grupe za izradu odluke o dimnjačarskoj djelatnosti

Dženan Rahman – predsjednik Komisije za procjenu šteta od prirodnih i drugih nesreća Općine Kakanj

Predstavnici medija:

NTV IC Kakanj

Radio Kakanj

„Kakanjske novine“

„Naša riječ“

„Kakanjlive“

„Kakanj-x“

„Kaportal“

Kratka saopćenja o radu sjednice i prethodnim pitanjima:

Predsjedavajući je rekao da je, u pripremi 9. redovne sjednice Općinskoga vijeća, Kolegij Općinskog vijeća 21.06.2017.godine razmatrao: Zapisnik Službe za imovinskopravne, geodetske poslove i katastar nekretnina sa sastanka povodom peticije mještana MZ Brnj, Dopis advokata Agić Suada, Demir Ševale, Zulić Amine i Grgić Ante u vezi naplate potraživanja JP „Vodokom“ d.o.o. Kakanj i Inicijativu Aktiva direktora Osnovnih škola općine Kakanj za podizanje kulturno-obrazovne saradnje sa općinom Beylikduzu Istanbul Turska.

Zapisnik Službe za imovinskopravne, geodetske poslove i katastar nekretnina sa sastanka povodom peticije mještana MZ Brnj Kolegij je primio k znanju.

U vezi Dopisa advokata Suada Agića, Ševale Demir, Amine Zulić i Ante Grgića u vezi naplate potraživanja JP „Vodokom“ d.o.o. Kakanj Kolegij je donio zaključak da se od JP „Vodokom“ d.o.o Kakanj zatraži informacija o tome kakva je dosad bila praksa, odnosno koji su efekti angažiranja advokata.

Inicijativa Aktiva direktora osnovnih škola općine Kakanj za podizanje kulturno-obrazovne saradnje sa općinom Beylikduzu Istanbul Turska je primljena k znanju sa zaključkom da općinski načelnik sa svojim nadležnim službama pripremi prijedlog odluke za sjednicu Vijeća.

Usvajanje zapisnika sa 8. sjednice Općinskog vijeća

Predsjedavajući je zapisnik sa 8. sjednice Vijeća stavio na razmatranje. Pošto nije bilo prijavljenih diskutanata, predsjedavajući je nakon glasanja konstatirao da je isti usvojen sa 25 glasova za, niko protiv i niko uzdržan.

Komentari na dostavljene odgovore na vijećnička pitanja:

Rizah Haračić: je rekao da nije dobio odgovor na vijećničko pitanje u vezi usporivača brzine na Željezničkoj stanici te tražio da nadležni odgovore na isto.

Nusret Muslić: je rekao da nije dobio odgovor u vezi klizišta na industrijskoj zoni i odgovornosti nadležnih. Istaknuo je zanemarive finansijske učinke ove industrijske zone koji, prema mišljenju DF-a, nisu na zadovoljavajućem nivou obzirom na milionska ulaganja. Uputio je apel da se ova industrijska zona stavi u funkciju kako bi svi imali koristi od nje. Također, osvrnuo se i na pitanje u vezi izrade monografije kakanjskih brigada i dodao da pozdravlja dosadašnje aktivnosti na izradi iste. U vezi pitanja novouposlenih radnika rekao je da odgovor nije dobio od svih te tražio da se isto pitanje ponovo uputi.

Komentari na dostavljena mišljenja na vijećničke inicijative:

Enes Piljug: je rekao da nije dobio mišljenje na vijećničku inicijativu u vezi postavljanja displeja na sahat-kulu te tražio od nadležnih da se izjasne.

Nusret Muslić: je rekao da je nadležna služba, vezano za inicijativu poboljšanja manifestacija za obilježavanja značajnih datuma, tražila pojašnjenje i prijedlog poboljšanja. S tim u vezi rekao je da bi jedno od poboljšanja bilo da svi vijećnici prisustvuju ovim manifestacijama. U vezi inicijative za postavljanje jarbola tražio je da se iznađu sredstva za realizaciju iste. Također, predložio je da se djeca koja primaju boračke stipendije, dođu i pročitaju imena poginulih boraca. U sve aktivnosti uključiti što veći broj učenika i studenata kroz literarne, likovne, dramske i druge sekcije kako bi se na taj način od zaborava spasila

historija. U vezi inicijative da se pacijenti na području općine Kakanj oslobode plaćanja dijagnostičkih nalaza aparata koje je donirala Općina, tražio je da se ipak iznađe mogućnost da se oslobode plaćanja pacijenti u socijalnoj potrebi. U vezi inicijative za regulacijom potoka u Alagićima rekao je da je općinska inspekcija izvršila nadzor što je dovelo u nezgodnu situaciju mještana u blizini te predložio da se pronađe rješenje kojim bi svi bili zadovoljni. Na kraju je dodao da se inicijative opozicije ne realiziraju onom dinamikom kao one koje dolaze iz pozicije.

Rizah Haračić: je tražio da mu se odgovori, koji nisu cjeloviti ili nisu konkretni, ne dostavljaju.

Vijećnička pitanja:

Rizah Haračić: je postavio dva vijećnička pitanja u vezi statusa javne česme u Povezicama i u vezi izgradnje pješačkog prijelaza preko industrijske pruge u MZ Bičer (da li su se tražila novčana sredstva od viših nivoa vlasti ali i samih Željeznica F BiH).

Safet Šahman: je postavio pitanje RMU Kakanj vezano za trasu puta D.Kakanj – Brnjic, tj da li se planira i je li moguće da se korito rijeke otvori kako bi se trenutna potopljena putna komunikacija otvorila prije zime.

Mugdin Gorak: je pitanje uputio Zavodu za planiranje i izgradnju općine Kakanj u vezi izgradnje puta Goraci – Bištrani.

Amar Selimović: je postavio pitanje u vezi rokova za izgradnju vodovoda u Lučanima.

Rešad Merdić: je postavio pitanje u vezi sanacije puta prema deponiji Bare i Novom naselju Bare, te tražio informaciju o pružnom prijelazu preko željezničke pruge puta za naseljena mjesta Bičer, Slijevnice, Dumanac, Desetnik.

Izudin Hrusto: je upitao da li će biti naknade za novonastale štete koje je nanijela prirodna nepogoda na poljoprivrednim dobrima.

Nusret Muslić: je upitao zašto se sa zvaničnih web i facebook stranica Općine Kakanj uklanjaju reakcije i komentari građana na određene objave na ovim stranicama, gdje građani iznose različite stavove i poglede u svojim komentarima na određene objave.

Adnan Ibrahimspahić: je postavio dva vijećnička pitanja: u vezi realizacije projekta izgradnje rasvjete u MZ Doboj od OŠ „15 April“ do ulice Vinski put i u vezi izgradnje kanalizacione mreže u MZ Doboj, ulica Vinski put.

Aldin Šljivo: je postavio vijećničko pitanje u vezi projekta uređenja izletišta u Tršću.

Vijećničke inicijative:

Aldin Šljivo: je uputio vijećničku inicijativu za rješavanje pitanja odvodnje kanalizacije u naselju Vrbica MZ Kakanj II nadležnoj službi Općine Kakanj.

Adisa Škulj: je podnijela dvije vijećničke inicijative za pregled dijela puta koji je asfaltiran u blizini škole u Brnjicu jer je potporni zid je urađen ispod nivoa puta tako da je asfalt bez oslonca i za rješavanje parking prostora u dijelu Stare jame za vrijeme pijace.

Izudin Hrusto: je podnio inicijativu za sanaciju novonastale divlje deponiju na teritoriji MZ Papratnica i tražio informaciju o broju studenata koji nisu dobili ni općinsku ni kantonalnu stipendiju.

Rizah Haračić: je podnio dvije vijećničke inicijative za izmjenu saobraćajnih projekata na relaciji Doboje – Kraljeva Sutjeska, Doboje – Papratnica, (da se razmotre projekti signalizacije na užem području općine Kakanj sa posebnom naznakom na ograničenje brzine) i za pomijeranje emitiranja sjednice Vijeća na NTV IC u terminu iza 17⁰⁰ sati.“

Nusret Muslić: je podnio vijećničku inicijativu za uređenje improvizovanih kupališta i da se izvrši uklanjanje visoke trave i žbunja oko zgrada koje se nalaze van vidnog polja sa glavnih saobraćajnica i oko pružnih prijelaza.

Jasmin Mušanović: je podnio vijećničku inicijativu za provođenje dezinfekcije žohara po zgradama sa akcentom na potkrovnne površine.

Semir Mušija: je podnio inicijativu prema J.P. Željeznice F BiH za provjeru i popravku saobraćajne signalizacije na pružnim prelazima u općini Kakanj.

Safet Šahman: je podnio vijećničku inicijativu za izlazak inspekcije na teren na dionici iznad škole u Brnjicu gdje je došlo do oštećenja puta na tek saniranom dijelu obaloutvrda i za izdvajanje Podnosim vijećničku inicijativu da se iz postojećih sredstava namjenjenih za poljoprivredu izdvoji dio za proizvođače koji se žele baviti organskom proizvodnjom.

Utvrdjivanje dnevnog reda

Predsjedavajući je za današnju sjednicu predložio dnevni red (PO POZIVU) koji je usaglašen na sjednici Kolegija Općinskoga vijeća održanoj 21.06.2017. godine. U međuvremenu je pristigao i materijal prijedlog odluke o uspostavljanju prijateljstva i suradnje između Općine Kakanj i Općine Beylikduzu, Republika Turska te je predložio da se isti uvrsti kao 9. tačka dnevnog reda. Sa ovom dopunom Vijeće bi razmatralo 12 tačaka.

Predsjedavajući je prijedložio da se navedeni prijedlog uvrsti u dnevni red i isti stavio na razmatranje i usvajanje. Dnevni red usvojen je sa 24 glasa za, niko protiv i niko uzdržan.

Usvojeni dnevni red:

1. Prijedlog odluke o utvrđivanju javnog interesa na nekretninama koje se nalaze na K.O. Mramor
2. Nacrt odluke o dimnjačarskoj djelatnosti
3. Prijedlog odluke o izmjenama i dopunama Programa utroška namjenskih sredstava za zaštitu okoline općine Kakanj za 2017.godinu
4. Prijedlog odluke o izmjenama i dopunama Odluke o pogodnostima za investiranje na području općine Kakanj
5. Prijedlog odluke o izmjenama i dopunama Programa utroška sredstava iz Budžeta Općine Kakanj za podsticaj razvoja poduzetništva i obrta za 2017. godinu
6. Prijedlog odluke o dopuni Odluke o naknadama općinskih vijećnika i radnih tijela Vijeća
7. Prijedlog odluke o načinu i uslovima raspolaganja nekretninama – poslovnim prostorima u vlasništvu Općine Kakanj
8. Prijedlog rješenja o imenovanju Komisije za provođenje postupka javnog nadmetanja (licitacije) pri prodaji nekretnina – poslovnih prostora u vlasništvu Općine Kakanj
9. Prijedlog odluke o uspostavljanju prijateljstva i saradnje između Općine Kakanj (Bosna i Hercegovina) i Općine Beylikduzu (Republika Turska)
10. Elaborat o procijenjenoj šteti i Informacija o klizištu Malješ
11. Inicijativa za zaključivanje Kolektivnog ugovora o pravima i obavezama poslodavca i radnika komunalnog preduzeća JP „Vodokom“ d.o.o. Kakanj
12. Informacija o obnovi i povratku izbjeglih i raseljenih lica/osoba na općini Kakanj u 2016. godini

Tačka 1.

Prijedlog odluke o utvrđivanju javnog interesa na nekretninama koje se nalaze na K.O. Mramor

Predlagač: Općinski načelnik,

Obrađivač: Služba za imovinskopravne, geodetske poslove i katastar nekretnina;

Izjavitelj: Nurčo Kurtović, pomoćnik općinskog načelnika

Stav i mišljenje: Komisija za ekologiju

U diskusiji je učestvovao: Enes Piljug, Rešad Merdić, Nusret Muslić i Slaven Katičić.

Enes Piljug: je rekao da nema ništa protiv prijedloga ali bi volio čuti i mišljenje mjesne zajednice.

Vesna Ajanović: je rekla da je predložena odluka štetna za Općinu Kakanj i da se treba dopuniti na način da se poslije tačke 2 prijedloga doda nova tačka 3 koja će glasiti: „Potpunoj eksproprijaciji nekretnina iz tačke 1. ove odluke pristupit će se kada JP Elektroprivreda BiH d.d. Sarajevo, ZD RMU Kakanj d.o.o. Kakanj dobije dozvolu za podzemnu i površinsku eksploataciju mineralno-industrijske sirovine, mrkog uglja, kada zaključi ugovor o koncesiji. Predložena tačka 3. postaje tačka 4.

Rešad Merdić: je upitao da li je ovaj prijedlog isti kao i onaj sa prethodne sjednice jer je Vijeće i taj prijedlog usvojilo.

Općinski načelnik: je podsjetio da je prilikom donošenja odluke na prošloj sjednici Vijeća obrazložio da se radi o sanaciji štete nastale elementarnom nepogodom što je tretirano Zakonom o zaštiti i spašavanju. U ovom prijedlogu radi se o odlaganju jalovine sa eksploatacionog područja i obzirom na aktualne tužbe Općine i na ovaj način bi se stvorio jedan pritisak na odgovorne da se ugovor zaključi.

Nusret Muslić: je rekao da je iz prethodne diskusije jasno da RMU radi nezakonito te upitao na koji način se JP Elektroprivreda odnosi prema drugim općinama, tj. da li tamo plaća koncesiju.

Općinski načelnik: je rekao da prema informacijama kojima raspolaže svi rudnici u Federaciji su zaključili koncesione ugovore izuzev rudnika iz Zeničko-dobojskog kantona (Zenica, Kakanj, Breza). Istina je da ne plaćaju puni iznos ali su preuzeli zakonsku obavezu plaćanja.

Slaven Katičić: je rekao da je prvobitni prijedlog izmijenjen na prijedlog predlagača te da će se Vijeće o takvom prijedlogu i izjasniti. Dodao je da opredjeljenje Vijeća treba da na neki način doprinese konačnom rješenju ovog problema što bi značilo uvjetovanje nadležnih da svoj rad dovedu u zakonske okvire.

Usljedila je pauza u radu Vijeća od 5' na prijedlog kluba vijećnika SBB-a.

Nakon pauze Nurčo Kurtović, pomoćnik općinskog načelnika, je pročitao dopunu prijedloga odluke koji glasi: Iza tačke 2. prijedloga dodaje se nova tačka 3. koja glasi: "Obavezuje se JP Elektroprivreda BiH d.d. Sarajevo, ZD RMU Kakanj d.o.o. Kakanj da prije početka izvođenja radova na nekretninama iz člana 1. ove Odluke zaključi ugovor o koncesiji." Dosadašnja tačka 3. prijedloga postaje tačka 4, a ostale odredbe Odluke ostaju nepromijenjene.

Predsjedavajući je ovako izmijenjen prijedlog stavio na glasanje i nakon glasanja konstatirao da je isti usvojen je sa 21 glasom za, 3 protiv i niko uzdržan.

Tačka 2.

Nacrt odluke o dimnjačarskoj djelatnosti

Predlagač: Općinski načelnik

Obrađivač: Radna grupa za izradu odluke o dimnjačarskoj djelatnosti

Izjavitelj: Amir Dedić, predsjednik Radne grupe

Stav i mišljenje: Komisija za Statut i propise, Privredni savjet

U diskusiji nije niko učestvovao pa je predsjedavajući zaključak o utvrđivanju nacrtu odluke sa rokom za javnu raspravu od 15 dana stavio na glasanje i nakon glasanja konstatirao da je isti usvojen sa 25 glasova za, niko protiv niko uzdržan.

Tačka 3.

Prijedlog odluke o izmjenama i dopunama Programa utroška namjenskih sredstava za zaštitu okoline općine Kakanj za 2017. godinu

Predlagač: Općinski načelnik;

Obrađivač: Služba za privredu, urbanizam i zaštitu okoline;

Izjavitelj: Mirza Fazlić, pomoćnik općinskog načelnika;

Stav i mišljenje: Komisija za ekologiju, Privredni savjet;

Obzirom da nije bilo rasprave, predsjedavajući je prijedlog odluke o izmjenama i dopunama Programa utroška namjenskih sredstava za zaštitu okoline općine Kakanj za 2017. godinu stavio na glasanje i nakon glasanja konstatirao da je isti usvojen sa 21 glasom za, niko protiv i 3 glasa uzdržana.

Tačka 4.

Prijedlog odluke o izmjenama i dopunama Odluke o pogodnostima za investiranje na području općine Kakanj

Predlagač: Općinski načelnik;

Obrađivač: Služba za privredu, urbanizam i zaštitu okoline;

Izjavitelj: Mirza Fazlić, pomoćnik općinskog načelnika;

Stav i mišljenje: Privredni savjet;

Nije bilo prijavljenih za raspravu pa je predsjedavajući prijedlog odluke o izmjenama i dopunama Odluke o pogodnostima za investiranje na području općine Kakanj stavio na glasanje i nakon glasanja konstatirao da je isti usvojen sa 24 glasa za, niko protiv i niko uzdržan.

Tačka 5.

Prijedlog odluke o izmjenama i dopunama Programa utroška sredstava iz Budžeta Općine Kakanj za podsticaj razvoja poduzetništva i obrta za 2017. godinu

Predlagač: Općinski načelnik;

Obrađivač: Služba za privredu, urbanizam i zaštitu okoline;

Izjavitelj: Mirza Fazlić, pomoćnik općinskog načelnika;

Stav i mišljenje: Privredni savjet;

Kako nije bilo rasprave, predsjedavajući je prijedlog odluke o izmjenama i dopunama Programa utroška sredstava iz Budžeta Općine Kakanj za podsticaj razvoja poduzetništva i obrta za 2017. godinu stavio na glasanje i nakon glasanja konstatirao da je isti usvojen sa 24 glasa za, niko protiv i niko uzdržan.

Tačka 6.

Prijedlog odluke o dopuni Odluke o naknadama općinskih vijećnika i radnih tijela Vijeća

Predlagač: Komisija za predstavke i prijedloge;

Obrađivač: Stručna služba za poslove Općinskog vijeća;

Izjavitelj: Izudin Hrusto, predsjednik Komisije;

Stav i mišljenje: Komisija za Statut i propise, Privredni savjet;

U diskusiji su učestvovali: Rešad Merdić, Fahrudin Buza i Nusret Muslić.

Rešad Merdić: je pitao šta je sa ostalim komisijama koje su bitne za Općinsko vijeće, kao što je Komisija za budžet, Privredni savjet itd.

Fahrudin Buza: se osvrnuo na prijedlog odluke o dopuni te predložio da se iznos koji Drugostepena komisija za žalbe može dobiti ograniči do 70,00 KM po održanoj sjednici.

Nusret Muslić: je rekao da je ispred kluba DF-a na sjednici Kolegija predlagano da se predmetnim prijedlogom odluke obuhvate sve komisije Općinskog vijeća, navodeći da svaka komisija ima svoju težinu, te da stoga klub DF-a neće podržati ovaj prijedlog odluke.

Uslijedila je pauza od 5'.

Nakon pauze, predsjedavajući je stavio na glasanje amandman vijećnika Fahrudina Buze, ispred kluba S BiH, a koji se odnosio na ograničenje u iznosu od 70,00 KM po održanoj sjednici, te poslije glasanja konstatirao da isti nije usvojen sa 6 glasova za, 2 glasa protiv i 17 uzdržanih.

Zatim se prešlo na glasanje o prijedlogu odluke o dopuni Odluke o naknadama općinskih vijećnika i radnih tijela Vijeća, te je predsjedavajući nakon glasanja konstatirao da je isti usvojen sa 17 glasova za, 8 glasova protiv i niko uzdržan.

Tačka 7.

Prijedlog odluke o načinu i uslovima raspolaganja nekretninama – poslovnim prostorima u vlasništvu Općine Kakanj

Predlagač: Općinski načelnik;

Obradivač: Zavod za planiranje i izgradnju općine Kakanj;

Izjavitelj: Zijad Neimarlija, direktor Zavoda;

Stav i mišljenje: Privredni savjet;

Zijad Neimarlija je u prijedlogu odluke dopunio tabelu sa tačkom 16 tako što je dodao još jedan poslovni prostor, navodeći površinu i cijenu po KM/m² za isti, te tražio da se u članu 3. predmetnog prijedloga odluke riječi „suvlasničkog dijela“ brišu.

U diskusiji je učestvovao Nusret Muslić.

Nusret Muslić: je pitao da li Općina, trenutno, po osnovu iznajmljivanja navedenih prostora ostvaruje prihode, te rekao da je, ukoliko prostori nisu iskorišteni odnosno ne donese dobit Općini Kakanj, klub DF-a svakako za to da se isti prodaju. Tražio je pojašnjenje u vezi sredstava koja bi se dobila prodajom poslovnih prostora obzirom da u obrazloženju predmetnog prijedloga odluke stoji da bi se ista koristila za izgradnju administrativne zgrade Općine i u vezi odgođenog plaćanja.

Zijad Neimarlija: je odgovorio da je od navedenih 16 prostora samo njih par dato na korištenje, uz veoma malu naknadu zakupnine, a da je cilj, prilikom izrade koncepta izgradnje zgrade Općine, bio da se od prodaje poslovnih prostora u vlasništvu Općine Kakanj finansira veći dio izgradnje nove administrativne zgrade Općine Kakanj, te da se zbog toga provedla procedura i izabrao izvođač radova koji će izgraditi objekat sa odgođenim plaćanjem za isti, što je u skladu sa zakonom i planirano budžetom.

Predsjedavajući je prijedlog odluke o načinu i uslovima raspolaganja nekretninama – poslovnim prostorima u vlasništvu Općine Kakanj, uz predloženu dopunu, stavio na glasanje i nakon glasanja konstatirao da je isti usvojen sa 25 glasova za, niko protiv i niko uzdržan.

Tačka 8.

Prijedlog rješenja o imenovanju Komisije za provođenje postupka javnog nadmetanja (licitacije) pri prodaji nekretnina – poslovnih prostora u vlasništvu Općine Kakanj

Predlagač: Komisija za izbor i imenovanja;

Obradivač: Zavod za planiranje i izgradnju općine Kakanj;

Izjavitelj: Edin Aliefendić, predsjednik Komisije za izbor i imenovanja;

Edin Aliefendić: je ispred Komisije za izbor i imenovanja, u svojstvu predsjednika, rekao da se za članove Komisije za provođenje postupka javnog nadmetanja (licitacije) pri prodaji nekretnina – poslovnih prostora u vlasništvu Općine Kakanj predlažu za predsjednika Sedmedin Amidić a za ostale članove Izudin Hrusto, Azerin Salihbegović, Selvedin Helja, Ivica Petrović, Elvedin Delić, Rahman Kovač i Elvedin Gačić.

Predsjedavajući je prijedlog rješenja o imenovanju Komisije za provođenje postupka javnog nadmetanja (licitacije) pri prodaji nekretnina – poslovnih prostora u vlasništvu Općine Kakanj, u sastavu kako je predložio predsjednik Komisije za izbor i imenovanja, stavio na glasanje i nakon glasanja konstatirao da je isti usvojen sa 24 glasa za, niko protiv i niko uzdržan.

Tačka 9.

Prijedlog odluke o uspostavljanju prijateljstva i saradnje između Općine Kakanj (Bosna i Hercegovina) i Općine Beylikduzu (Republika Turska)

Predlagač: Općinski načelnik;

Obrađivač: Stručna služba za poslove općinskog načelnika;

Izjavitelj: Enver Kusić, sekretar organa uprave;

Stav i mišljenje: Komisija za ljudska prava i ravnopravnost spolova, Komisija za mlade;

Pošto nije bilo prijavljenih diskutanata predsjedavajući je prijedlog odluke o uspostavljanju prijateljstva i saradnje između Općine Kakanj (Bosna i Hercegovina) i Općine Beylikduzu (Republika Turska) stavio na glasanje i nakon glasanja konstatirao da je isti usvojen sa 25 glasova za, niko protiv i niko uzdržan.

Tačka 10.

Elaborat o procijenjenoj šteti i Informacija o klizištu Malješ

Predlagač: Općinski načelnik;

Obrađivač: Služba civilne zaštite;

Izjavitelj: Nurudin Hrusto, pomoćnik općinskog načelnika;

Stav i mišljenje: Komisija za ljudska prava i ravnopravnost spolova, Komisija za ekologiju;

U diskusiji su učestvovali Enes Piljug i Nusret Muslić.

Enes Piljug: je rekao da je Komisija za ekologiju, u svom mišljenju koje je dostavljeno Vijeću, dala svoje sugestije, koje su podržane, ali je rekao da je i dalje, uz poštovanje prema struci i elaboriranju, zabrinut za sigurnost mještana Malješa iz razloga što smatra da zidom koji je napravljen nije sve riješeno.

Nusret Muslić: je izrazio zadovoljstvo što se navedeni posao završio, navodeći da, bez obzira koliko je koštao, bitno je da nije bilo ljudskih žrtava, ali je istakao da se uvijek govori o aktuelnom stanju a ne o uzrocima koji su doveli do ovakvog stanja. Osvrnuo se na osnovne karakteristike uzroka štete navedene u Elaboratu te rekao da je otprilike identifikovana neka odgovornost, te u skladu sa navedenim postavio pitanje u smislu da se utvrdi ko je uzrokovao navedene posljedice, te zatim da li se vodilo računa o svemu prilikom izgradnje industrijske zone itd. te konstatovao da će se ovakve situacije dešavati sve dok se neko ne kazni i ne preuzme odgovornost.

Općinski načelnik: je pozvao vijećnike da diskutiraju o ovoj problematici na način da iznesu konkretna pitanja i argumente, kao i to da se kaže šta se trebalo uraditi obzirom na činjenicu da se, i pored poteškoća, prvobitni površinski kop doveo u stanje funkcionalnosti sa pet poslovnih hala u kojima radi preko tri stotine ljudi i pratećom infrastrukturom. Dodao je da prilikom radova nije urađena drenaža u gornjem dijelu zone jer nije bilo naznaka da vode u tom dijelu ima, ali da se nakon pojave klizišta, kako bi se otklonila sumnja, ista uradila te se ispostavilo da uzrok klizišta nije zbog vode na gornjem dijelu zone. Radilo o vrlo zahtjevnom građevinskom projektu. Naveo je da su u Elaboratu navedeni razlozi klizanja terena i za svaki razlog može se samo nagađati koji je doveo do klizišta (nelegalno eksploatisanje uglja; kapitaža koja je tu bila zatrpna itd.) jer Općina tu nije poduzimala nikakve radove osim radova koji su bili na objektima za koje su izdate građevinske dozvole. Dodao je da se u suštini radi o špekulacijama i da je potrebno jasno i glasno reći ako je poznato ko je i šta je uzrokovalo nepogodu sa dokazima kako bi se mogao pokrenuti postupak odgovornosti. Osvrnuo se na izvršene radove na sanaciji klizišta (zahtjevna izgradnja potpornog zida) i čestitao jedinicama civilne zaštite, vatrogascima i uposlenicima Općine koji su dan-noć bili na terenu, te se zahvalio građanima Malješa na izuzetnoj strpljivosti i pomoći. Na kraju je rekao da smatra da je urađeno sve kako bi se stanovništvo sigurno vratilo u svoje kuće i da je na neki način preuzeta i odgovornost kad je proglašen završetak stanja elementarne nepogode.

Nusret Muslić: je rekao da je u svom izlaganju imao namjeru pitati da li je, ukoliko je projektnom dokumentacijom predviđeno, urađeno odvodnjavanje oborinskih voda ili ne. Zatim, ako je rečeno da je određeno skladištenje materijala uzrokovalo klizanje u određenoj mjeri, da se utvrdi ko i kako je u određenoj mjeri odgovoran, te istakao da je potrebno projekte ispoštovati od početka do kraja kao i procedure a sve zbog dešavanja u budućnosti.

Nakon diskusije, predsjedavajući je Elaborat o procijenjenoj šteti i Informaciju o klizištu Malješ stavio na glasanje i nakon glasanja konstatirao da je Elaborat usvojen i Informacija primljena k znanju sa 23 glasa za, niko protiv i sa 2 glasa uzdržana.

Tačka 11.

Inicijativa za zaključivanje Kolektivnog ugovora o pravima i obavezama poslodavca i radnika komunalnog preduzeća JP „Vodokom“ d.o.o. Kakanj

Predlagač: Sindikat JP „Vodokom“ d.o.o. Kakanj;

Stav i mišljenje: Komisija za Statut i propise, Privredni savjet;

Ispred Kantonalnog sindikata Vijeću se obratio predsjednik Mehrudin Isaković, a potom se obratio Fehim Merdić, predsjednik Sindikata JP „Vodokom“ d.o.o. Kakanj.

U diskusiji su učestvovali: Semir Mušija, Edin Aliefendić, Rizah Haračić, Slaven Katičić, Haris Veispahić.

Semir Mušija: je rekao da su na Kolegiju Vijeća koji je prethodio ovoj sjednici, nakon što je konstatovano da sindikat ispunjava uslove reprezentativnosti, definisani koraci koje treba preduzeti kada je u pitanju Inicijativa za zaključivanje kolektivnog ugovora kao što je formiranje pregovaračkog tima ispred Općine koji će sa pregovaračkim timom Sindikata JP „Vodokom“ d.o.o. Kakanj izdefinisati konačan prijedlog ugovora kako bi se isti mogao već na narednoj sjednici razmatrati i usvojiti, a sve u skladu sa Zakonom o radu, Općim i Granskim kolektivnim ugovorom.

Edin Aliefendić: je ispred kluba SDA predložio da Općinsko vijeće Inicijativu prihvati, da se imenuje pregovarački tim ispred Općinskog vijeća i za članove pregovaračkog tima predložio Eldina Mijoča, Adnana Ibrahimspahića i Semira Mušiju.

Rizah Haračić: je izrazio zadovoljstvo u vezi predmetne inicijative te predložio pregovaračkom timu ispred Općinskog vijeća da prilikom pregovaranja pokušaju izjednačiti prava radnika u javnim ustanovama, javnim preduzećima i Općini Kakanj kako u pogledu plate tako i ostalih naknada.

Slaven Katičić: je rekao da je, s obzirom na važnost ove tačke dnevnog reda, u pripremi materijala za ovu sjednicu, Stručna služba za poslove Općinskog vijeća pripremila jedan Zaključak, kako bi se aktivnosti oko predmetne Inicijative odvijale u pravom smislu, a kojim bi se nakon eventualnog prihvatanja Inicijative od strane Općinskog vijeća ovlastila Komisija za Statut i propise da kao pregovarački tim obavi kolektivno pregovaranje na osnovu protokola koji će potpisati predsjedavajući. Rekao je da je klub SDA u pogledu pregovaračkog tima dao svoj prijedlog, ali da bi se prema njegovom mišljenju radilo o sukobu interesa ako bi se imenovao Eldin Mijoč obzirom da je i vijećnik a i uposlenik JP „Vodokom“ d.o.o. Kakanj kao i član sindikata, te rekao da bi ipak Komisija za Statut i propise, obzirom na njenu stručnost, trebala da bude u funkciji pregovaračkog tima.

Haris Veispahić: je rekao da je materijal koji je dostavljen u okviru predmetne inicijative pun grešaka, ali da se ne zamjeri na istom, te da radnici treba da se bore za svoja prava, ali je istakao da su isti uvijek imali i podršku od strane Vijeća kao i drugih organa pa i kad to nije bilo realno kao što je npr. povećanje uposlenih u predmetnom preduzeću mimo svake potrebe tog preduzeća, povećanje cijene usluga navedenog preduzeća, zatim da je dat maksimalan doprinos da se znatnim iznosom sredstava direktno iz budžeta, kroz programe utroška sredstava a kroz izvođenje radova ili usluga, pomognu radnici tog preduzeća, a i da se preduzeće sačuva kao pravni subjekt. Istakao je da opet nije krivica na radnicima, nego na upravi preduzeća, ne samo sadašnjoj nego i ranijim upravama. Dalje je iznio svoj stav da prava radnika kroz predmetni akt neće biti zaštićena u potpunosti, obzirom da istim nisu detaljno regulisana prava radnika, ističući da je za radnike i sindikat puno važniji Pravilnik o radu koji se treba usvojiti te usmjerio njihovu pažnju na navedeni Pravilnik i saradnju sa Upravom preduzeća.

Fehim Merdić: je rekao da su ispred Sindikata spremni pregovarati, te da su predmetnu inicijativu pokrenuli iz razloga što su im ugrožena osnovna ljudska prava.

Na prijedlog kluba SBB-a uslijedila je pauza od 5'.

Nakon pauze predsjedavajući je Inicijativu za zaključivanje kolektivnog ugovora o pravima i obavezama poslodavca i radnika komunalnog preduzeća JP „Vodokom” d.o.o. Kakanj, sa prijedlogom članova pregovaračkog tima: Semir Mušija, Adnan Ibrahimspahić i Rešad Merdić stavio na glasanje i nakon glasanja konstatirao da je Zaključkom usvojena Inicijativa i regulisane ostale pojedinosti oko pregovaranja sa 24 glasa za, niko protiv i niko uzdržan.

Tačka 12.

Informacija o obnovi i povratku izbjeglih i raseljenih lica/osoba na općini Kakanj u 2016. godini

Predlagač: Općinski načelnik;

Obrađivač: Služba civilne zaštite;

Izjavitelj: Nurudin Hrusto, pomoćnik općinskog načelnika;

Stav i mišljenje: Komisija za ljudska prava i ravnopravnost spolova;

Obzirom da nije bilo prijavljenih za raspravu, predsjedavajući je Informaciju o obnovi i povratku izbjeglih i raseljenih lica/osoba na općini Kakanj u 2016. godini stavio na glasanje i nakon glasanja konstatirao da je ista prihvaćena jednoglasno sa 24 glasa za, niko protiv i niko uzdržan.

Predsjedavajući se zahvalio svim prisutnim i zaključio rad 9. redovne sjednice Općinskoga vijeća

Sjednica je završena u 12:21 h.

Audiozapis sa sjednice Vijeća pohranjen je u elektronskoj formi (CD-u) i sastavni je dio ovog zapisnika.

**SEKRETAR
OPĆINSKOG VIJEĆA**
Ferdo Mijač

**PREDSJEDAVAJUĆI
OPĆINSKOG VIJEĆA**
Slaven Katičić
